

釋迦氏譜卷上

壁一

唐 釋 道 宣 撰

古德流言祖佛為師羞觀佛之本系紹釋為
姓恥尋釋氏之根源以今據量頗為實錄既
云華俗義匪憑虛昔南齊僧祐律師者學通
內外行總維持撰釋迦譜一帙十卷援引事
類繁縟神襟自可前修博觀非為後進標領
余年迫秋方命臨悲谷屢獲勸勉力復陳之
試舉五科用開三返想同族法種詳斯意焉

一序所依賢劫

謂今時運名
所以建立

二序氏族根源

謂得姓久近
根條離合

三序所託方土

謂居止洲中
何義而知

四序法王化相

謂族興法王
處世化相

五序聖凡後胤

謂法俗兩裔
流遠不絕

初序所依賢劫者夫以天地開闢習俗常談
太素太易陰陽覆載考校終古無的可尋委
以百家不無虛構或云天傾西北地缺東南
練五石而上補斷鼇足而下接乃至天地人
皇蛇軀牛首九紀四姓作牧君人斯途紛糅
無足陳叙今依正教備舉劫緣劫是何名此

云時也若依西梵名曰劫波此土譯之名大時也此一大時其年無數假以喻顯方可委知經云如一大城方四十里滿中芥子有長壽天三年取一芥城雖空劫猶未盡方四十里石一拂三年石雖磨盡劫時未盡如是劫劫相接展轉無窮有命四生常沉不出今北劫者名之曰賢以劫初時大水彌滿生青蓮華其數一千第四禪天曾見往事便相告曰今此世界有千佛現可目此時以爲賢劫故經說云即賢劫中千佛是也從拘留孫爲首

最後成佛號曰樓至是知第一拘留孫如來第二拘那含牟尼第三迦葉波第四釋迦牟尼我等所師則賢劫中第四佛也如小乘經賢劫之前劫空無佛九十一劫獨毘婆尸三十四劫二佛出世接賢劫中四佛成七如常所說如大乘經^{卷一}三世三劫劫有千佛^二過去莊嚴劫現在名賢未來星宿三千王子次第成佛斯由心解明昧感見殊途垂機敷化不可較定至如鷲山一會尚退五千般若大空證舍小果淨土不減在於登住之夫大火燒盡

誠歸起沒之士用斯比量不足有疑此劫名
賢表千佛現須知也

二序氏族根源

天姓氏之興本欲召其質也故隨物類而命
其形名焉至如東夏姓源本唯有九故云或
因謚號唐虞文武等是也或因爵封王侯宋
衛等是也或因官字司馬司徒伯仲叔季等
是也或因居處則城郭園池或因事有則陶
丘筮卜或因任職則三鳥五鹿宋裔隨務流
廣滋彰即目自形不勞繁述

大夏種姓有四不同謂刹帝利婆羅門毘舍
首陀羅也刹利王種最為高貴劫初以來相
承不絕餘之三姓非此所論但明佛姓自分
五別一曰瞿曇二曰甘蔑三曰釋迦四曰舍
夷五曰日種言瞿曇者如十二遊經云昔者
菩薩阿僧祇劫初為國王父母早喪讓位求
道師姓瞿曇因從氏焉唐言瞿曇者星名也
如此張氏因星立姓故涅槃經云彌瞿曇姓
自古相傳言瞿曇者此云泥土也但是譯人
取語輕重今問梵僧言瞿荼者泥土也求曇

者星名也故知因星得姓定非泥土

言甘蔗者即如彼經菩薩往於甘蔗園中遊止修道因園命氏又名甘蔗故佛所行讚云甘蔗之苗裔者是也于時菩薩於園念道以宿業故為賊所得貫在木上流血于地大仙瞿曇天眼清淨菩薩絕嗣後佛無由從山飛來哀斂死屍取土中血以泥團之著兩器中還返所止以神呪力滿足十月左變為男右變為女瞿曇仙氏遂復興焉

言舍夷者如四分律云佛舍夷種亦云舍夷

國未審此名

言釋迦者長阿含云過去有王名曰懿摩

十輪王去著薩身一百世擯斥四子第四子名莊嚴即白淨王所生今遠

出國奉王命已到北雪山住直材中彌沙塞

律云居雪山北四方遐曠衆果滋茂頓駕數

年歸德如市鬱為強國父思往召辭過不還

父王三歎我子有能因名釋種本起云定光

佛曰汝於來世當成為佛號釋迦文佛釋迦

為能文為仁也準今唐譯與本起同故此四

子因能命氏然釋迦姓經文單複有類此方

方朔馬卿等也彌沙塞云住直樹林又名爲
釋今據梵音呼直爲釋天竺諸事一物多名
此又因林而命氏矣若準別傳彼土有樹名
曰釋迦根幹茂盛善相者云必出國主因移
四子立國命氏未詳雖非經教即附異聞也言曰種者曇
無德律云父姓名爲日也未詳其緣統明五異同
宗一氏隨事流變故有斯分然釋一姓羣籍
多明自餘出沒任緣而舉故祐律師云仰惟
定光受記表號釋迦玄符冥契故託釋種名
出於未形之前跡孚於既生之後炤灼天人

聯綿曠劫其爲源也遠矣乎

余尋瞿曇一氏父也釋迦一氏母也故五人
隨菩薩者名佛爲瞿曇也斯即子承父姓理
路顯然四分律云父姓名爲日生處名釋迦
明知母姓也瞿曇古仙取血藏器後化男女
遂有釋門覈源一血後分二體姻媾胎變支
流遂廣據本而談誠滔禮數約緣徵事大義
天乖何者按釋氏婚媾並絕族親冥符此土
周孔立教以世紹輪王望高天下分宗納娉
不交卑族計其二姓同祖古仙胎血不殊理

例難絕至如東夏姓氏多本五帝三王今則
交媾姻婭取別判無從矣

上明姓氏所由今明族源所起長阿含云大
劫初成未有日月光音諸天福盡下生皆化
爲人歡喜爲食身光遠照飛行自在無有男
女尊卑親眷自然地味狀如酥蜜有試嘗者
遂生搏食光滅通亡呼嗟在地食多貌悴食
少形澤便興勝負地味便沒又生地皮又生
地膚因食多少諸惡湊集又生杭米衆味備
美有貪食者具男女根如是展轉便爲夫婦

遂始胎生樓炭云自然杭米朝刈暮熟中含
云米長四寸人競預取如此相教預取之處
後更不生祐律師云澆風旣動則淳源斯謝
精靈通感則霆擊爲遲竊承兩漢之日東萊
加租而海魚潛泳合浦增賦而璣蚌遠移以
近方古有逾符契不生杭米未足異疑長阿
含云爾時衆生旣見杭米不重生故各懷憂
惱互封田宅以爲疆畔遂有自藏已米盜他
田穀由是事起無能決者議立一人號平等
主賞善罰惡仍供給之時有一人容質瓌偉

威嚴肅物衆所信伏便共請知彼既受已遂
有民主名焉樓炭云衆人自言爲我作長號
之曰王以取租故名刹利此譯刹利名爲四地主以初分地日各有爭訟乃立此主時閻浮天下富樂安隱地生青草
如孔雀毛八萬郡國聚落相聞無有寒熱病
惱之者王以正治奉行十善互相崇敬猶如
父子人壽極久不可量計後有餘王不行正
法其壽遂減至十萬歲如是漸減至今百年
上明釋氏所先本於劫初創始爲王展轉相
列轉輪粟散紹續之相

- | | | | | | | | | | |
|-----------------------------------|----------------------------|---------------------------|--------|--------------------------|---------|----------|----------|----------|---------|
| 初民主王號曰大人 <small>出四分律餘出長阿含</small> | 第二王名珍寶 <small>大人子也</small> | 第四王名靜齋 <small>好味子</small> | 第六王名善行 | 第八王名妙味 <small>世一</small> | 第十王名外仙 | 第十二王名嗜欲 | 第十四王名斷結 | 第十六王名寶藏 | 第十八王名善見 |
| 第三王名好味 <small>珍寶子</small> | 第五王名頂生 | 第七王名宅行 | 第九王名味帝 | 第十一王名百智 <small>六</small> | 第十三王名善欲 | 第十五王名大斷結 | 第十七王名大寶藏 | 第十九王名大善見 | |

第二十王名無憂

第二十一王名洲渚

第二十二王名殖生

第二十三王名山嶽

第二十四王名神天

第二十五王名造力

第二十六王名牢車

第二十七王名十車

第二十八王名百車

第二十九王名牢弓

第三十王名十弓

牢弓子

第三十一王名百弓

十弓子

第三十二王名養收

百弓子

第三十三王名善思

養收子律名其闍

自善思王後有十族轉輪聖王相續

律中亦爾名或

同不

第一輪王樓炭云真闍王子名波延迦有

五轉輪聖王

第二輪王樓炭云多羅葉王有五轉輪聖

王

第三輪王樓炭云阿波葉王有七轉輪聖

王

第四輪王樓炭云捷陀利王有八轉輪聖

王

第五輪王樓炭云迦陵伽王有九轉輪聖

王

第六輪王樓炭云遮波瞻婆王有十四轉

輪聖王

第七輪王樓炭云拘獵羅婆王有三十一

轉輪聖王

第八輪王樓炭云般闍羅王有三十二轉

輪聖王

第九輪王樓炭云彌尸利王有八萬四千

轉輪聖王

第十輪王樓炭云壹摩彌王有百轉輪聖

王
律云
師摩
誌

此十輪王經律互出名數大同但恐凡聖有
濫今以事徵無容八萬純是聖帝止可十輪
是正餘胤是凡如律所明但云次第相承有
王約經並云聖帝定是從本為聖從流並是
凡攝又如第十輪云百轉輪王則佛之父祖
是聖也今但菩薩現感有文是聖自餘父族
皆是凡王可以例知

序佛七世緣

第七世祖名大善生四分律云懿師摩次第

百王後有王名大善生有人云此即摩之子也今以為摩後第九十四世王也故經云最後王名大善生斯為良證

第六世祖名懿師摩經云烏婆羅第五世祖名憂

羅陀冰婆羅第四世高祖名瞿羅尼求第三世

冒祖名尼浮羅第二世祖名師子頰第一世

菩薩父名淨飯樓炭及律並云師子頰子名悅頭檀

金輪王名菩薩悉達鐵輪王名羅睺羅

已前依檢爰初宇宙造化裁成肇建皇極絃維羣品發源民主迄于善思系嫡相承三十

三世公斯已後十代教興並是聖王俱稱帝種同胤則可從正嫡異緒或是支離莫不受天明命君臨寰宇長源遠嗣難以測知至若兩漢諸帝非嫡者多魏晉宋齊瓜葛承襲以斯例彼理固然乎

今從初舉數凡八萬四千三百五十三王後

至於菩薩初三十三王粟散而已次十輪種族八萬四千三百一十又加宗主

十輪數則同矣

菩薩祖師子頰王有四子

一名淨飯本起云白淨有經但號淨者二名白飯十二遊經無飯

字四王 三名斛飯 四名甘露飯 經中亦爾

淨飯王有二子長名悉達 即善次名難陀

白飯王有二子長名調達次名阿難

斛飯王有二子長名摩訶男次名阿那律

甘露飯王有二子一長名娑婆次名跋提

女名甘露味

十二遊經云

調達四月七日食時生身長一丈五尺四

寸 佛從兄弟二叔子

菩薩四月八日明星出時生身長一丈六

尺

佛弟難陀四月九日生身長一丈五尺四

寸

阿難四月十日生身長一丈五尺三寸 是佛

從弟兄是調達

三序所託方土

今以六義定方所中

徵名 約量 辨時 從勢 籍勝 考文

余聞佛稱大聖機教匪凡義豈邊鄙方為匡

化所以閭浮一域面周四海環海之州理居

中正故因果經云菩薩昔在兜率天說補處

行期運將至當下作佛觀諸國土何者處中即知迦毘羅國最是地之中也又本起云佛之威神至尊至重不可生邊地爲傾斜此迦毘羅城三千日月天地之中央也往古佛興皆出於此又俱舍論云剌浮洲之中

此洲或名閻浮

剌浮勝部皆取音不同

有金剛座上與地齊下至金剛輪際以有此座菩薩坐之入金剛定得成覺道除此座外地則不勝唯此洲有三方則無以佛不往彼成道故所以然者良由人稱至聖道德尊高人天羣有莫不迴向故託茲勝

座表化物良緣至於震旦一洲緣居海右軒轅五嶽曲指嵩山以爲中也然則周旦揆日圭程景分未盡漢傲自高諸夏張掖有年局號中原偏稱中國以事考定中義自亡原夫立中之名待邊爲稱神州東則拒海三方蔑聞此則邊義自彰不俟分析雖云四海貢職萬國歡心乃夸飾於一朝終負實於千代今以剌浮一域中分葱嶺西號大夏五竺統焉東曰赤縣五嶽統焉雖兩方皆五事必偏中此方在東彼土居正何以明耶按閻浮圖云

葱嶺西據香山東南綿亘至於蜀部

此山相狀西北

東南角雄而列冬夏積雪故此山東名為赤縣雖云中國

局對四嶽而立名焉

約例陰陽宅經凡宅中主勿犯亦是一家之忌

至於山西南面號曰天竺山海經云身毒之

國軒轅氏居之

郭璞注云即天竺也

彼土自分以為五

國中天竺國天地之中名既非邊四陲斯絕

據名以定中義存焉二以里數約量明之刻

浮洲者須彌山南一域之都名也按聖論云

水時所經東西二十四萬里南北二十八萬

里若依人物所居東西十一萬六千里南北

畧同今以中天為正四方相拒各五萬八千

里此方東拒海隅三方彌遠即事已求安得

比乎又刻浮洲者是樹名也須彌山王大海

正中四方四洲一洲即一天下也此樹生於

南洲之北枝臨大海海底有金十一金名閻浮光

聖一

浮水上故此洲名從金受稱若據唐譯閻浮

者上勝金也提者洲也此上勝洲大夏天竺

居其心矣

三以時序明之夫以陰陽寒暑隨方起用此

土神州炎涼不等南則瘴癘炎盛北則方暑

凝冰雖有少華終非大舉中天竺國冬夏常
調弗苦寒熱卉木恒茂無悴流霜蓋由處非
邊鄙風雨無差陰陽交泰庶物停毒故西域
圖經云五天竺國北洎雪山南洎大海六萬
餘里川澤坦然更無山阜但有河水分注林
木森列餘之三方面帶山隴迤相連屬有類
東川良由世界初構羣生業力結茲勝壤以
待佛興即事求諸非中何謂按高僧傳云昔
晉何承天善明緯候元二畧景與智嚴法師
共詳偏正嚴云余曾遊天竺備謁聖儀至於

畧冠頗懷通覽中天竺國夏至之日方中無
影良是地中故也此方雖南測影臺者至夏
至日終有餘分故非大夏但名東夏也承天
聞此無以抗言

四以水源徵之竊以四海爲壑水趣所極也
閭浮洲中有大香山即崑崙之別名也此山
獨高洲中最極山南有池名阿耨達此名無
熱惱也具八功德大龍所居名爲水府方出
一河以注四海所以水隨高勢以赴下流彼
高此下中邊定矣此土黃河源出於彼故爾

雅云河出崑崙墟色白郭璞圖讚云崑崙三
層號曰天柱寔維河源水之靈府禹貢道河
自積石者據其伏流涌出爲言也故知水隋
高來高爲中矣又河圖云崑崙山東南方五
千里號曰神州亦稱赤縣崑崙名爲天柱理
非偏隅號此東南明知非正又李叟西奔崑
崙抑亦朝宗有據黃帝夢遊華胥於事從中
又顯如元幼解云華胥國者即天竺國

央座此二王昇居中制遠理義然也自餘小
聖小王隨機匡牧任土作化未論偏正何以
然者土地山川並是人之依報人之勝劣報
必藉羸今中天竺國處旣高華明知二王福
報之所感也此土聖帝亦有所尊五帝三王
不及難田之地秦漢已後方聞西域之方遂
使甘英博望相從雪嶺霍公定遠前後登踐
多歷葱河之北少出香雪之南所以鐵門西
屏實唯大宛月支本是獫狁之鄉無文之國
也何得濫稱中土有教之方乎

是西域四郡休屠所居

漢武所開
方為今有

六以文字徵之此土方言討尋無
本文字開俗肇自古皇或鳥跡垂文或科斗
程字或史籀制篆或程邈造隸六文紛其昭
晰八體煥乎斯彰勘諸史冊難得定指詳於
顧氏之論亦附寶公之篇所以三蒼三雅總
會說文字本九十字源極矣字林字統字宛
十一
桂宛世增二萬澆流漸繁抑惟人情無可憑
據天竺音字一唯上天天分二十八部並尊
梵王為主所以世界初立人物俱空梵天來
下遂有情品故梵天有生之元始音字亦隨

彼而族之今則梵音梵文五天同軌若凡若
聖今古一同故一音所演唯指梵言羣生各
解乃隨方類此方有述胡書胡語者此曲指
嶺北三十六蕃實唯戎胡不參大夏故大宛
月支書語各別不干天竺佛生之地相去數
萬無得混同大雪山南五天之國言語承天
萬代恒定所遵既勝明知非邊震旦文言下
方蟲鳥或出凡情曾無典據義非中矣
四明法王下降迹
原夫釋譜所興止存法王下降所以大仙分

血牌合成形由斯紹嗣方延釋種自法王降
迹照臨忍方羣生何幸仰茲陶誘使夫二十
五有絕生死之因九十八使斷牽連之業並
超三界俱戴一乘含育蒙大造之恩至人引
勤勞之慮故有垂茲聖迹布此靈儀令重昏
動其玄機浪識靜其漂怒方爲入道弘轍亦
乃出有初門而事總冥緣義符神運抑非天
授諒寔人謀但禎瑞氤氲嘉祥雜沓輝煥天
地引耀幽明然則文物光乎萬古聲明高於
視聽所以薄列鴻猷用觀弘範至於經傳八

相迹示五生自結教門今存蓋闕此但約緣
通舉以顯譜源

初處兜率天迹

二降閻浮洲迹

三現生靈誕迹

四集藝歷試迹

五出家尋教迹

六乘時成佛迹

七說法開化迹

八遷神化掩迹

處兜率天迹第一

因果經云釋迦如來未成佛時爲大菩薩名
曰善慧功行滿已位登補處生兜率大名曰
聖善爲諸天主說補處行亦於十方現身說

法期運將至當下作佛

降闍浮洲迹第二

初與念相

普曜經云菩薩住兜率天有六十六億諸天
共議言今菩薩將降當生何國父母真正宗
族和穆威德雄猛志性弘雅各言諸國皆有
便問菩薩何國降神菩薩答言其國種姓有
六十種德一生補處爾乃降神文多不載今此釋
種熾盛五穀豐熟人民滋茂相承德本父性
仁賢母懷貞良前五百世為菩薩母應往降

神處彼胞胎因果經云又觀五事一觀衆生
受道熟未即知皆是初發心來所成熟者二
觀時者即知堪受清淨妙法三觀何國處在
地心即知此三千世界閻浮提中迦毘羅國
最在地中四觀何族貴盛即知釋迦第一甘
蔗苗裔聖王之後五觀往緣即知十五白淨王過
去有緣王真可為父母又知其母壽命滿足
十月生已七日便即命終菩薩爾時為欲廣
利諸天故現五衰相文如諸天退相又現五瑞一光
照大千二地十八相動三魔宮隱蔽四三光

不明五八部震駭于時諸天見是兩相具問
菩薩菩薩答言當捨此天生閻浮提諸天聞
已咸慕久住菩薩答曰生無不死愛合必離
諸行無常寂滅為樂我生釋種出家成佛當
為衆生建大法幢竭煩惱海淨八正道設大
法會請諸天人汝等亦當同飡法食諸天聞
已咸喜願生

二現入胎相

普曜經云菩薩問天以何形貌降神母胎梵
天強威白言梵典所尊象形第一何以故三

獸渡水兔馬未知深淺用譬二乘不達法本
象步盡底以譬大乘解暢三界便以春末夏
初中國以十二月十六日為春初
四月十六日為夏三時各四月樹始華茂
沸宿應下化為白象諸根寂定現從日光所
行不左降母右脅瑞應修行二經皆云化乘
六牙白象冠日之精發兜率宮諸天翼從滿
虛空中作樂散華大光普照以四月八日明
星出時降神母胎夫人眠夢見人乘象入右
脅內影現於外如在瑠璃身安心樂覺已具
說王觀瑞相召明占者皆曰此胎聖子當為

輪王若出家者必成正覺

疑入胎月太早

爾時諸天

皆見菩薩已生王宮當成佛道我等當爲眷

屬及受法化于時凡有九十九億諸天下生

人間又有從他化以下生於人中其數無量

又有色界諸天爲受道故下生人間而作仙

人

三明處胎相

本起經云菩薩處胎夫人修行六度天食自

然三千世界常光明朗病者除滅三毒停息

菩薩自身肢節相好皆悉具足行住坐卧無

有妨礙又於晨朝爲色界諸天說法日中欲

界日晡鬼神夜亦三時說正法要利益衆生

普曜云在胎十月開化三十六載天人使立

三乘聖道

現生靈誕迹第三

初往林殿飾相

普曜云時王思惟懷娠將滿作此念時夫人

白王欲往園觀即勅莊嚴藍毘尼園華果泉

池欄楯階陛七寶莊飾鸞鳳衆鳥翔集其中

幡蓋妓樂香華備滿十萬寶輦四兵外備采

女姿妙八萬四千給侍夫人又擇童女八萬四千齋持香華先往彼園又勅臣婦皆令侍從夫人爾時即昇寶輿導從往林滿空八部亦同隨往

大華嚴云林中現瑞凡有十種乃至十方諸

佛臍中放光普照此林現佛方來

二正誕靈儀相

普曜云王后臨產乘雲母車遊憐鞞樹坐師子牀六反震動三千國土四天挽車梵王前尊樹爲屈枝經云十月滿足於四月八日日

初出時於無憂樹下華葉茂盛便舉右手欲

牽摘之菩薩漸漸從右脇出佛所行讚云古

昔王生或從股生手生頂生腋生我從右脇

而生大善權經菩薩欲不由胞胎一頃成佛

爲防人疑恐是變化不受法故現受胎生經

中前後所現皆滅疑生信文多不載

今以四
月八日

入胎亦以此月八日
生則十二月在胎也

三發號顯德相

經云于時樹下生七莖七寶蓮華大如車輪

菩薩隨蓮華上無扶侍者自行七步大善權

云爲應七覺故行七步涅槃經於十方面各行七步經云便舉右手言我於一切天人中最尊最勝無量生死盡矣利益一切天人大權云舉手現相者爲除外道自尊必墮惡道故本起云天上天下唯我爲尊三界皆苦何可樂者

四諸天奉侍相

經云時四天王以天繒接待置寶几上帝釋執蓋梵王執白拂左右侍立難陀龍王兄弟於空吐水溫涼沐浴身普曜云釋梵雨香九

龍下香水浴身修行云水左溫右冷釋衣裘身

五現大瑞應相

經云太子身黃金色三十二相光照大千天龍八部空中作樂歌頌佛德燒香散華雨衣瓔珞繽紛亂墜爾時夫人安止樹下忽生四井具八功德水隨次洗漱諸夜又王圍繞守護一切天人讚歎種智速成佛道早轉法輪度脫衆生唯有魔王不安本座爾時瑞應又降三十有四文多不述于時采女以天繒毼

裹抱太子至夫人所又二十八大神四角奉護青衣還宮白王說奇特相王嚴四兵與億釋姓導從入園見相殊異喜懼交懷諸釋一日生五百男修行云國中長者八萬四千各誕是男廐馬生駒八萬四千其一特異毛白髦朱本起云奴名車匿馬名健陟象馬生白子牛羊生五色羔犢各有五百頭青衣五百各生蒼頭普曜云生五千力士五百伏藏自然發現又八國王同日生男時爲嘉祐六入天寺相

經云時白淨王將禮天神前抱太子置象輿上羣臣采女諸天作樂隨從入城往諸天祠梵釋天像皆從座起禮太子足言此太子者天人中尊如何今欲禮於我耶羣臣內外見此事已歎未曾有將太子出還入本宮

七立名建號相

卷二

十九

經云王欲立名廣請婆羅門集已抱太子出請爲作名即共通論云太子生時寶藏皆現諸瑞吉祥可立名爲薩婆悉達

此言

頌吉空中天神擊大天鼓燒香散華唱言善哉因立此名

八召仙占覩相

經云王召善相者五百人於大寶殿令占太子咸言出家成佛在家輪王又曰香山大仙阿私陀者具五神通能斷王疑彼仙應念騰空到宮將太子出欲令致敬便止之曰此乃三界中尊即起合掌禮太子足便具相已忽然悲泣便言至年十九爲轉輪王若出家者成一切智然必成佛說法度人以相明顯皆得其處我今已年百二十矣不久生無想天不覩佛興故自悲耳

九保傳隨侍相

經云王時聞仙決定說已慮恐出家選五百青衣爲依乳母種種供奉起三時殿七寶莊嚴城門開閉聞四十里五百采女宿衛殿宇華果池鳥不可稱計爾時姨母乳養太子年漸長大王作寶冠璅珞玩好之具無不給與舉國仁惠安樂難言

十母氏昇遐相

太子本起云菩薩本知母人之德不堪受禮因其將終而從生焉普曜云太子生七日後

母便命終生忉利天五萬梵天各執寶瓶三萬魔妻手執寶縷而共侍衛三世佛母皆同此相大權經云福盡生天非菩薩各前處兜率觀后餘命十月七日故託神來

集藝歷試迹第四

經云太子七歲王召選友爲太子師起學堂以書教之普曜云手執金筆檀隸珠牀問師曰書有六十四文多不具如何但二種而相教耶即爲分別本末師不能達反啓其志凡諸伎藝典籍射御天文算術自然知之至年十歲

從弟調達與五百釋童相謂曰太子聰慧善明書論至於筋力詎勝我等請共摘之聲鼓唱令欲講武藝有象當門調達搏頭蹀地難陀足挑路側太子手擲城外還接著地不令苦痛又入園中施列金銀銅鐵等各有七鼓調達先射徹三難陀亦爾太子取先祖輪王弓放箭徹過諸鼓入地泉出過大鐵圍調達難陀相撲力等太子徐執二弟蹀之初立爲儲后相

經云時王會議應立太子以二月八日具物

盛四大海水諸仙諸人各各頂戴已授與父
王便灌太子頂以寶印付之擊鼓宣令言今
立薩婆悉達以爲太子空天八部同聲讚言
善哉諸八國王所生太子亦同時立

二觀耕生厭相

經云太子出遊前至王田息閭浮樹日光輝
赫樹爲曲枝蔭太子身看諸耕人淨居天化
爲死蟲鳥隨啄吞見已起慈逮得四禪王尋
後至慰引將還慮其出家更增妓女娛樂衆
具令其心止

三示納妃孕相

經云太子十七王乃訪婚釋種婆羅門有女
禮儀備舉便迎至宮行卧同俱無世俗意靜
夜禪觀妓女疑之修行瑞應云諸人咸疑太
子不男便指妃腹曰却後六年爾當生男遂
以有娠大權經云菩薩無欲爲斷非男疑故
納瞿夷羅雲於天没化生不由合會又是本
願所致

四出遊四門相

經云太子聞妓歌詠園林便欲遊觀導從出

城東門觀者如雲淨居天化爲老人御者答
曰云云又聞一切皆老便念我身老至如電
身安足恃迴車還宮厭心益增迦毘四面各
有一園林池樓觀莊嚴無異太子出遊南城
門外淨居諸天化爲病人見便愁思即迴車
還有婆羅門子名優陀夷聰辨絕倫王令爲
太子友解喻憂憤不得輒離又經少時出城
西門路見死人四人輦之室家共送淨居所
化唯太子及友見便問答已益懷戰怖一切
皆死吾豈久存即迴在宮更入餘園思言禪

觀久懷厭離又遊北門下馬息樹除侍思禪
淨居化爲比丘法服持鉢執錫視地徐行而
過太子前問答云我是比丘能破結賊不染
六塵便現通力騰虛而去官屬皆覩深會本
懷太子曰善哉唯此爲快決心修道即迴車
馬大生欣慶

釋迦氏譜卷上

釋迦氏譜卷

唐

釋

道

宣

撰

壁二

出家尋教迹第五

初啓出家相

經云至年十九思出家時將已至矣到父王

壁二

所頭面作禮王抱令坐白言思欲出家必願

聽許學於聖道王執其手流淚言曰宜息此

懷國未有嗣普曜云欲不老等四願故出家

耳王言古今難免汝何預憂

二天神接舉相

普曜經云相師白王今不出家過七日已轉輪王位自然來應王聞益喜即嚴四兵一由旬內以防守之內外警嚴因果云我年十九今二月七日出家時至又留國嗣滿父王願便放身光照四天王乃至淨居不令人見諸天即下禮足白言無量劫來修行今熟答曰如汝等言然內外防衛欲去無從天以神力悉令淳昏而卧普曜云諸天遙白涕星適現即令車匿轍犍陟來四天王與夜叉龍等皆被鎧甲從四方來于時馬鳴奴泣總安撫已

見明相出光照十方太子即師子吼言過去諸佛出家亦然於是諸天捧馬四足并接車匿釋天執蓋從北門出太子又云不斷八苦不轉法輪不成菩提要不還此天讚善哉至曉便止已行三由旬諸天使沒不見

三剃髮捨俗相

經云太子至閑靜林以寶冠明珠瓔珞嚴飾具與車匿已以劍自剃鬚髮作是誓言願共一切除斷煩惱于時天帝接髮而去讚言善哉大權云菩薩之頂無能見者況能除髮故

自剃髮又除王恨故又念過去諸佛法衣不以七寶淨居天知己化作獵師身服袈裟善薩即以寶衣而用貿之智論云所貿得衣麤布僧伽梨也經云車匿見已知志不迴馬嘶同返

四尋仙非奪相

經云太子至跋伽仙林中鳥獸矚目仙人謂是天神與徒衆迎請坐太子見諸仙人草樹皮葉以爲衣者或食華果草木或日止一食三日一食者或事水火日月翹脚卧灰棘水

火上者問其所由答欲生天便告仙曰汝諸所求終不離苦言論反覆乃至日暮明旦辭去諸仙答曰所修道異不敢相留可往北行彼有大仙可就語論不必往彼極視乃還

五王師尋迹相

經云時王見車匿還愛念情深自欲隨逐王師大臣諫曰王不當往太子生日百神呈瑞諸天悉奉云何樂世仙人定占不居王位我等自尋遂至仙所並云已過中路遙見樹下思惟臣便具告太子曰豈不知恩但爲四患

苦耳終無返步便起尋仙王臣即留五人伺察所在便度恒河路遊王舍舉國王民命駕追之捨位相邀全不降志爲說世患遂至迦蘭仙所交論非奪亦如上說

六同邪苦行相

太子調伏二仙人已進伽闍山苦行林憍陳如五人住處尼連河側靜慮六年度苦行者天獻麻米淨心守戒日食一麻米或七日食一麻米者陳如五人亦學苦行遣人白王具述苦相王聞大悲即嚴五百乘車姨母耶輸

各嚴五百資生之車令車匿領送既達不受
還令返宮

七浴身受食相

經云菩薩自念我今苦行形如枯木垂滿六
年不得解脫憶昔禪定是最真正爲滅外邪
自餓非道我當受食然後成佛即從座起入
河洗浴身體羸瘦天爲按樹得攀出池有牧
牛女淨居天勸令施乳糜即取奉上咒願受
食身力充足堪受菩提五人見驚謂爲退轉
各還所止菩薩獨詣畢鉢羅樹以德重故地

動作聲盲龍得眼見瑞讚頌五百青雀右繞
飛空瑞雲香風交相映拂同過去佛以草爲
座帝釋化人執淨軟草受已敷坐如過去佛
結跏趺坐不成正覺不起此座天龍歡喜諸
相難言觀佛三昧云大化作樹乃至高八千
里者下劣薄福見坐草蓐

乘時成佛迹第六

初降魔顯德相

處胎經云菩薩坐閻浮樹四十八日觀樹思
惟感動天地光蔽魔宮波旬卧夢見三十二

變

文多不具

從覺恐怖召會臣兵并召千子

五百千信

告

薩五百隨父教

又告四女先令往壞現三十二姿

媚相

文多不具

變成老母觀佛三昧云三女莊飾

眇目妖冶禮敬菩薩以身奉侍寶器天味以

上菩薩爾時身心寂然不動白毫擬之女身

九孔根本二藏

聖二

自見厭惡八萬戶蟲啖食諸

藏見便嘔吐身左蛇頭右狐頭中首狗頭背

負老母抱死小兒諸女驚號匍匐而去魔王

大怒遍勅六天并諸八部各興四兵盡其變

態又勅閻羅阿鼻苦具一切都舉向菩薩所

波旬震吼勅諸兵衆武器交橫滿虛空中互

相迫脅不能得近菩薩徐舉眉毫擬獄罪人

白毫出水注火滅已自憶作罪心得清涼稱

南無佛因生人中魔王前近與佛相難

文如本起

菩薩以智慧力伸手按地應時地動魔與兵

衆顛倒而墮

二斷惑成覺相

經云爾時菩薩以慈善力二月七日夜降魔

放光入定觀法即得三明六通具足遍觀三

界三世諸事皆知名色是諸惡因受行八正

衆苦便滅菩薩自知已除三毒生死根本所作已成智慧明了明星出時霍然大悟得成正覺得十八法十種神力四無所畏于時大地十八相動天清風輕瑞雲雨甘又雨天華天鼓自鳴繞菩薩樹滿三十六由旬八部充壁二溢諸天具樂幢幡無量一切衆生皆相慈愛五五淨居天并五通仙及餘苦趣咸大歡喜說法開化迹第七初興念愍物相經云如來於七日中觀樹思惟我以盡漏本

願成滿得甚深法唯佛能知然諸衆生處五濁世三毒所覆薄福無智不解深法若轉法輪迷生誹謗當墮惡道受無量苦今者寧可入般涅槃普曜云正覺成道移坐石室念九十六師各信所奉我今如何將救拔之二梵王來請相經云時大梵王見成聖果默然而住心懷憂惱衆生長夜沉沒生死今當往請轉大法輪即來佛所白言世尊往昔爲衆生故久住生死廣修德本今成佛道云何默然欲界六天

亦同勸請如是者三至滿七日默然受已各還所止

三懷土念機相

經云佛告樹神此波羅柰仙人住處鹿苑之中人民雖少宿緣有在得法眼淨即以道眼念彼二仙並已壽終又念五人歷侍苦辛可爲說法

四受供商者納鉢相

本起經云樹神念佛得道七日未有獻者有五百賈人經山邊過車牛皆躡有兩大人提

謂波利與衆見相詣神請福彼神現身具告

前意即和麁蜜詣樹上佛爾時如來便念往

佛以鉢受食時四天王即往頗那山上自然

石中出四大鉢四王各取以上於佛乃總受

累左手中右手按之四際分明呪願已受麁

食之澡漱洗鉢即受三歸因與之別律加髮

爪與之起塔

塔今現在

五道逢非機相

經云如來前行威儀詳序路逢外道名優波伽見相歎伏以偈問答心生希有合掌圍遶

而去回顧望沒乃止

六遇兩龍供相

本起經云行至文鱗盲龍水邊坐定七日風雨大至佛不喘息光照水中龍目得開即識如來如前三佛具香水出前遶七帀身離佛所圍四十里龍有七頭羅覆佛上而以障蔽七日一心不患飢渴雨止化爲年少道人衣服鮮好稽首問訊便受三歸

七乘機授法相

經云即復往波羅柰五人所遙見佛來謂未

成道各相約言不須起敬佛既至止不覺起禮互爲執事既違本誓深自生愧以昔徵難佛具爲解說五陰輪迴三有諸苦陳如最初悟解四諦得法眼生八萬那由空天亦法眼淨

八聲告化境相

壁三

七

經云地神見陳如得道已高聲唱言如來出世轉妙法輪空天又唱乃至阿迦膩吒天地十八相動天龍八部作樂讚歎世界大明次爲四人重說四諦亦離塵垢得法眼淨

九出家表僧相

經云時彼五人既見道跡欲求出家世尊喚言善來比丘鬚髮自墮即成沙門重說五陰解成羅漢世間有六佛是佛寶四諦法寶五人曾寶是世間三寶具足天人第一福田

十次第度人相

經云次度長者子耶舍得初果父來覓子佛為說法得法眼淨為說三歸優婆塞初又度耶舍同友五十人皆得初果

不久皆得羅漢

十一分頭化人相

經云佛告諸比丘汝所作已辦堪為福田宜各遊方以慈度物我獨往摩竭提度諸人民便頭面禮足持衣鉢分道而去經云佛往摩竭提國有優樓迦葉兄弟三人學古仙道王臣歸信利根我慢難可摧伏便往投宿乃止龍窟當夕降龍明以示之雖伏神力猶言我真後四天王下帝釋下梵王下各放光明內心私仰後事火具佛力制之雖強不可師徒詣佛受降許已方遂其志又請共住四事供給日辦好食自行請佛往此洲北取閻浮果

等普曜云往忉利天取晝度樹果餘三天下
取果早至皆歎訝神竒帝釋指地成池八德
具足供佛澡漱迦葉具問欣感天瑞猶不伏
從佛見弊帛拾取浣之心念須石帝釋化方
石樹間又往香山取大石槽盛水供浣迦葉
具問私懷歎仰又以他日佛入池浴樹神按
枝佛仍樹坐迦葉設會七日國王臣民大集
恐佛來至見相感動願不來會便往北洲七
夜不還餘有殘饌念佛當至應念便到即問
不來之意佛具以答心驚毛豎雖謂竒特終

謂自真又於他日知彼根熟往趣河側魔王
白佛宜可涅槃佛言我四部未具外道未降
便還天宮時佛入水令水兩開行處塵出迦
葉遙見謂被沒溺即與弟子乘船來救既見
歎仰請佛上船如來貫船底而出加坐於中
師徒歎美然口不伏本起云汝非羅漢不知
道證胡爲強顏不識羞耻自稱道德迦葉心
愧稽首白言大仙善知我心唯佛攝受佛言
汝年百二十多有弟子衆所恭敬必入我法
當告令知遂與同謀俱從正化先度迦葉證

第四果又度門人五百下流二弟各有二百五十弟子見事火具從流而下俱到兄所亦受佛化皆爲說法並成四果

十二赴瓶沙本願相

佛度三仙已念言王舍本願便詣頻婆娑羅

建二

九

王所佛在杖林中普曜云王聞佛至大悅導從八萬四千來至佛所咸疑師弟乃令迦葉現通除疑說偈告衆爲王說法得法眼淨八萬那由他人九十六那由他天同得法眼王以竹園施佛諸王見佛瓶沙爲初僧伽藍者

竹園爲初

十三度舍利弗目連相

經云佛在竹園王城二婆羅門有大智慧舉世所稱各有一百弟子共爲親友有阿耆比丘入城乞食舍利弗見心異遍身具問所學畧說一偈便得初果還爲目連再說得道即將弟子往詣竹園佛遙授記彼來二人爲吾上足便呼善來出家悟聖爾時摩竭提國有一千二百五十比丘皆大阿羅漢經中多述重其初故也

十四度金色大迦葉緣

有偷羅國婆羅門名曰迦葉三十二相通諸
書論巨富能施妻亦相具俱無世欲捨家入
山念言諸佛出家修道我亦當然便著千兩
金壞色納衣自剃鬚髮山中靜念空天告言
今有佛出便趣竹園佛往逆之與共承受說
法悟阿羅漢有大威德天人所重故名大也
乃至佛滅住持法化被於來世六萬歲者此
人之力

十五佛還本生緣

晉曜經云王聞得道已經六年悲喜欲見有
梵志名優陀夷是菩薩侍王令往請別闍已
來經十二年思一相見受命往請佛告善來
得悟四果即遣還報現通本國却後七日佛
當來降王出四十里迎佛廣列侍衛動大千
界王見大喜三選豪族五百人為沙門十令侍于
時難陀亦作沙門前禮使人天地大動佛入
宮中羅雲前來佛變多身一而不異羅雲徑
來趣真佛所為表無瑕舉國同慶安樂無事
歲三月六奉戒無絕

遷神化掩迹第八

初魔王重請入滅相

長阿含云佛在毘舍離與阿難獨居後夏舉體皆痛告阿難諸有修四神足在意所欲可得不死一劫有餘佛多於是天人獲安如是再三阿難爲魔所蔽不悟佛意魔請佛言願入涅槃乃至三請告言是後三月於本生處拘尸那竭娑羅園雙樹間當取滅度即天地大動人物驚怖佛言八動八相便集大衆普告令知涅槃云二月十五日晨朝放光照大

千界乃至十方六趣衆生遇光罪滅同聲哀戀五十四衆一時雲集各設供具乃至十方無量佛國皆來同赴唯除迦葉阿難二衆所應現已先從口入會中有優婆塞純陀等一十五人俱設供度成熟粳飯滿足八斛以佛

神力充足大會

卷二

二囑累終事相

經云佛爾時安慰大衆廣爲說法明三寶常住既聞法已不生滅想又云諸善男子自修其心慎莫放逸我今背痛欲卧如常患者汝

等文殊爲衆說法今以大法付囑於汝乃至迦葉阿難等來亦當付囑

三標處現滅相

長阿含云佛入城向雙樹間令阿難敷座使足南首北面向西方以法久流北方故佛自四繫僧伽梨偃右脅如師子王累足而卧眾神以華散地佛廣說往昔六返作輪王於此也厝骨我今成正覺已於此處復捨身命涅槃有菩薩名迦葉廣問病因并決諸疑佛從卧起放大光明照無量土八熱八寒諸地獄

苦皆悉消滅光中說言一切衆生皆有佛性廣說法要度人無數故現倚卧令未得道者爲得道因又爲八部大設供養以千端氎纏身七寶棺盛香油灌香木焚二甕不然一在外一在內爲諸衆生分散舍利故長阿含云佛記千二百弟子所得道果披鬱多羅僧出金色臂說佛出世如優曇華

四正滅度相

雙卷泥洹經云告諸比丘佛之遺令必共慎之却後一億四千餘歲乃復有佛我爲聖師

至七十九所應作者並已究暢汝其勉之夜
已半矣無宜放逸善法由生萬物無常此是
後說於是世尊即入初禪二三四禪空識不
用至非想定入滅盡定從定起已入非想定
乃至四三二初禪又從初禪入二三四禪從
定起已入般涅槃十三于時大地震動幽冥大明
天雨香華散大會上梵釋神天各作偈頌諸
比丘等悲慟殞絕阿那律告止諸天滿空諸
比丘等悲號搔擾恐有怪責既聞此喻互相
裁抑

五終後殞殮相

經曰諸比丘竟夜講法達于天曉那律告阿
難入城告知如來已滅度宜知所作聞已悲
慟各齋香華樂具詣樹供養竟一日已以舍
利置牀上諸天舉角入城鬼門遍諸里巷國
人皆出詣城西門在高顯處天意留至七日
令得供養又出北門度尼連河天冠寺中各
嚴眾具以輪王法供辦葬具香水浴已劫貝
周纏內金棺中外鐵槨盛沉檀名香積上將
欲加火而天滅之待迦葉故

六母來重起相

摩耶經云佛涅槃時夫人天上五衰相現五大惡夢時阿那律殞如來已昇天告之聞心悶絕甦已與耆屬下遙見佛棺不能自勝前至頂禮天華布散顧見大衣鉢杖執之悲感兩下成河佛以神力棺蓋欸開合掌舉慰從內起坐放千光明時佛合掌問訊摩耶屈遠來下諸行法爾願勿啼哭廣說諸偈佛言如來爲後不孝諸人故行上事此名母子相見經便與辭別棺便忽闔三千界動八部悲感

七現雙足相

經云大迦葉在波波國見尼乾執天華知佛滅度詣天冠寺欲見佛身三請不許遠積合掌佛重棺出雙足有異色具問知女人淚汗四部諸天俱禮佛足須臾自隱迦葉遠積三帀說偈不燒自然樹神滅火香華供養長阿舍云終夜燒盡忽生四樹八天上人中分骨相雙卷泥洹經云諸王嚴四兵至請以義和不者力爭有婆羅門曰如來遺身廣利一切當

分供養前以上牙送阿闍世以副傾遲以石
瓶塗蜜用分八國了已請著瓶者議以賞之
又乞地炭四十九斛依起四十九塔諸王得
分便起八塔瓶炭及髮爲十一髮生時者初未分
前天帝與諸龍王來索舍利若不見與力足
相伏即共三分一分諸天一分龍王一分八
國當維耶處起寶塔高四十九仞阿育王經
云諸王分已各自數得八萬四千粒舍利佛
一口髭無敢取者以阿闍世初來之時聞佛
滅度車中投地氣將欲絕心重故持與之將

還在道難陀龍來道逢力諍以髭與之於須
彌山下起水高八萬四千里起水精塔及阿
育收舍利勅鬼作鐵網縱海欲縛龍王龍怖
伺阿育睡捧入海宮見塔高大故以言謝曰
佛與我要乃至劫盡所有經戒袈裟應器皆
藏此塔彌勒來下當復出著故不壞也阿育
聞此謝而上出
五序聖凡後胤
夫法王出世開俗爲先俗則祖習曾高族氏
之緣紹續故隨俗命氏如前所列法門所制

無擁爲初四姓入者同皆沒滅但依法種而爲後嗣故增一云四河入海無復本名同名大海四姓出家無復本姓但言沙門釋迦子所以然者生由我生成從法成當求方便得作釋子當如是學彌沙塞長阿含云乃至彌勒佛時諸比丘等姓慈皆言慈子

從兄調達生滅相一

中本起經云父王見迦葉千人心精形陋外無容貌即選宗族有儀充僧光暉佛相各莊極華觀者盈路欲來佛所調達冠墮和離象

狀占者不祥俱請出家佛言夫爲沙門實爲不易汝宜在家分檀惠施如是者三調達惡念佛妬我耶即自剃髮修行梵行後犯五逆生入地獄口稱南無乃至佛記後出作辟支佛名曰南無目連解六十四音往地獄慰之

答言我卧阿鼻苦而無倦

壁二

大論伽離

十五

謗舍利

弗故終入蓮華地獄

從弟那律跋提出家相二

四分阿那律母爲作三時殿采女娛樂兄摩訶男以家事累欲自出家釋種八人同時出

家先度優波離心除慢故時跋提獨坐樹間
夜中高聲言甚樂以事白佛我念在家內外
自衛猶有恐怖今獨在塚間無恐懼患我念
出離之樂佛言善哉釋子斯道甚快

弟孫陀羅難陀出家緣三

普曜經云佛在迦維國將阿難入城乞食難
陀樓上遙見下至佛所取鉢盛食令送至園
逼令出家閉七靜室後私逃還路值佛來樹
下自隱欲見婦故佛將上天便圖天女路經
地獄恐迫導到佛以瞎獼猴譏之事見雜藏

阿難以偈譏之

如羝羊相觸

將前而更却

汝爲欲持戒

其事亦如是

云云

羅雲出家緣四

未曾有經云佛令目連往本城問父母三叔
并耶輸令割愛放子得聖道已當還度母絕
生死本並隨佛語父母又勅豪族五十各捨
一子隨羅睺往時年九歲佛令阿難剃髮并
五十人一時出家舍利佛爲和尚目連作闍
梨授十戒因說扇提羅等無行食施後受罪

報便欲捨道重爲說法心開意解普曜云佛
還入宮瞿夷携羅雲來稽首時王臣懷疑佛
出家十二年何從出子佛言此吾之子緣吾
化生勿咎瞿夷彌沙塞云佛自將羅睺還令
舍利弗度王聞懊惱國嗣永絕請勅比丘勿
輒度人祐尋律與經事緣碩反良以對情不
同故兩存其說又觀釋族爲盛雲布赤澤雖
法俗誠異而獲道斯同難陀棄榮欲以從道
羅雲捨輪位爲襲法梅檀圍遶龍象成羣靡
親靡踈隨慙而度調御之美於茲可見

釋迦姨母出家緣_五

中本起經云佛還本國大愛道自言我聞女
人出家得四道果願得出家佛言且止女人
入法非究暢梵行如是三返而退後重伸請
如前不許便與女人追佛頓止河上如前復
求又亦不許退在門外徒跣立啼阿難見問
具答即爲上請佛言止止如男少女多家則
衰弱女人出家法不久住廣說譬類重請養
育長大佛言信有是恩然我成佛其恩亦多
得歸三寶不疑四諦立信五根受持五戒皆

由我故假使女人作沙門者八敬之法不得
踰越盡受行之可入法律阿難出告便頂受
佛教又言以度女人滅我正法後五百年異
學奉敬並漸衰微大方便云天魔惡邪毀佛
法僧故不聽度阿難請言如來豈不同過去
佛耶具四部眾佛言發大精進修八敬法未
來世中諸善女人念阿難恩稱名供養阿難
以大威神應聲護助僧祐律師云仰惟三世
諸佛四部咸備而憍曇彌析法亟於拒塞者
豈非女人障厚方爲道蠹故切磋掎擊以勵

將來者乎

釋迦父王泥洹記六

經云父王重病告諸臣曰命斷無慮恨諸子
等在王舍去此五十由旬佛爲大慈神通徹
視願垂救接佛聞悵遲垂命即告難陀阿難
羅雲各速往及命在即以神力忽然而至放
大光明照觸患損以金色臂著王額上爲說
經法王大歡喜引佛手心上心禮於佛忽然
後世諸釋香汁浴身纏殮棺盛佛難陀喪前
肅立阿難羅雲住在喪足佛念世人不孝兇

暴設法化故躬欲擔棺大千世界巔義踊沒
欲界諸天龍神請擔棺佛令四王擔棺肩上
自執香爐在前而行百千羅漢飛來勅徃海
渚取香木大積焚之佛說離生死法火滅收
骨金函起塔佛言父王淨行生淨居天

祐律師云余觀無常之變甚矣固有形而莫
免也夫以天尊衛疾而不能延齡金掌在心
而無救對至是以聖人修長壽之果而不卷
蕉沫之身也
釋迦母氏登天佛徃相_七

佛在忉利天歡喜園質多樹下三月安居光
照大千光中千華皆有化佛佛告文殊令來
禮敬母聞乳流入如來口便與文殊來至佛
所如來出梵音曰身所經處與苦樂俱當修
涅槃永離苦樂摩耶聞法得須陀洹果三月
將盡令鳩摩羅告閻浮提如來將下欲入涅槃
帝釋作三道階佛與母別下躡寶階梵天
執蓋四天王侍衛四部大衆導從滿空諸王
大集奉迎祇洹祐云敬惟佛生七日母昇忉
利三世佛法莫不自然摩耶積因記化誕聖

是以既為天師而方味其乳已入涅槃而還起致敬欲報之德於斯至矣

釋迦姨母大愛道泥洹緣八

摩訶波闍波提此言大愛道也亦名瞿曇彌姨母大愛道告眾曰吾不忍見佛滅度與五

百除饑女

即比丘尼座僧會往法鏡云聖斷六情飢饉故得號焉

俱到

佛所禮已白言欲先滅度佛默然以手摩佛足曰此最後見如來也佛為說身患滅度為安諸尼禮還於精舍布五百座各現神足上動諸天俱時泥洹佛告阿難入城遍告令與

供養乃闍維之捧舍利詣佛所四方比丘千

人飛來就座佛令阿難取舍利鉢盛佛兩手

受已告諸比丘斯聚舍利本是穢身敗道壞

德陰謀嫉妬今母能拔愚穢興丈夫行遷神

本無四眾八部興塔供養僉曰唯然

聖二

十九

雜阿含云難陀親所生母也增一云佛令阿

難難陀羅雲輦大愛道佛親供養帝釋四王

欲供養之佛言止止父母生子多有恩德要

當報恩不得不報三世諸佛母先滅度皆自

供養闍維舍利佛自舉牀一脚阿難又舉飛

至塚間佛取栴檀著其身上便說四人應起塔供養以皆十善化物故祐尋姨母爲德恩均所生是以持舉之重爰酬鞠育所以勸報復勵無恩人也

釋迦族流滅相九

長阿含云波斯匿王娉於釋氏乃以婢女妻之立爲太后生子流離經云以初要時諸釋紛爭故也至年八歲往詣外家學諸射術時作新堂欲請佛僧初供養故流離輒上昇師子座諸釋捉臂逐出流離恨歎語左右待我紹位當告此事

後嗣王位嚴兵將往佛聞往枯樹下王見禮問答親族之廢故勝外人聞此迴軍佞臣重譏更集兵徃目連白佛欲擲兵衆他方世界佛言汝取釋種宿業擲之又欲鐵網覆城又欲舉城空中佛皆如上止云業熟受報不可奪也是時諸釋一由旬內遙射王軍皆中丘器不傷身肉流離大怖佞臣諫之諸釋受戒必不害人兵至圍城無敢出者有釋童子獨據城上多射軍衆死者無數因此又散釋種呼下汝年幼小何辱我門殺人罪重可速出

國於是童子四人拜辭出城諸國聞之舉以爲王今烏長國王即其後也流離又集令使開門兵入取諸釋埋脚象蹈令死取五百女將自執之諸女罵辱便斬手足摩訶男入水請放釋出從語放出業迷還入王怪入水太

生一

二十

久求之已死王悔便止凡殺九千九百九十萬人血流成河迴軍舍衛又殺太子祇陀佛記生天釋女被害在坑念佛佛即至彼天給衣食便爲說法皆得生天

佛至迦毘東門見烟火洞然至尼拘律樹下

坐告諸比丘此城空虛更無主矣便至舍衛曰王及衆軍七日皆滅聞皆大怖慮有外寇七日既滿平安自慶將兵詣河卒大震雷暴風疾雨一時漂沒死入阿鼻天火燒宮佛便爲說往古諸釋捕魚本事

釋氏罪畢經云王迴軍已遣使敬佛佛曰王自愛矣釋罪畢矣却後七日太山鬼以火逼王文多不載

法句譬云目連聞佛說法意猶不已往舍夷國取知識四千人內鉢舉上空中王殺三

億人已目連貢高白佛弟子承佛救得諸人
今在空存佛令視之皆已死盡因為說法逮
得法眼祐律師云竊惟大聖垂經押揚懲誠
夫以正覺之尊萬累久絕絕累塵劫而甫示
餘報明知釋種之滅非力能免斯實止煞之

深誠慎業之明規也

聖二

世

遺迹遠近緣元缺文

十

釋迦竹園精舍緣

十一

律云摩竭王念佛初至園即以施住佛知此
念便往竹園王以金瓶授水於佛以園奉佛

佛言當施佛僧若是佛物無能用者以敬如
塔故王便從教便施佛僧種種莊嚴眾具受
用以冬夏常茂亦曰寒林也中本起云本施外道國王追
悔欲以奉佛大鬼將軍勅閱又撾打外道怖
而捨去後請佛受之菩薩藏云過去諸佛皆

遊此園若有入者自然無欲又無毒心

釋迦祇洹精舍緣

十二

賢愚經云舍衛大臣名須達多財寶無限極
濟貧乏故號為給孤獨七男異才欲娉小者
自往王舍初聞佛名心大歡喜後見佛得初

果請佛還國先營精舍共舍利弗買太子祇陀園以金布地遍八十頃地園樹及門太子作之時有外道三億萬人共舍利弗較術諍取金園大衆通集十八億人舍利弗現通說法各得道跡六師弟子三億人出家從道共須達引繩起基六天空現爲佛作栴檀窟別房住止千二百處百二十處別打犍椎寺成白王請佛俱來受施二人共作故寺立二名雜阿含云須達病佛看病困終記得三果生兜率天以本願故生天後來至佛所說偈不

載余據那舍果人不生欲界本願曲聞故爾祐案息心所栖是曰精舍竹林祇樹爰始基構遺風餘製扇被于今至於須達妙果所謂顯徵者矣

釋迦髮爪塔緣 十三

十誦云佛遊經久須達思見佛與髮甲起塔作欄拱欒栢種種莊嚴常令供養

釋迦天上四塔記 十四

忉利城東照明園佛髮塔城南麤澁園佛衣塔城西歡喜園佛鉢塔城北駕御園佛牙塔

大論云天帝取菩薩髮天上城東立塔取寶衣立衣塔此未成佛前者案經律人中有四大塔生處塔在迦維羅衛國林微園中成道塔在摩竭提國善勝道場元吉樹下轉法輪塔在波羅柰國仙人住處鹿野苑中涅槃塔在拘夷那竭國力士生地秀林雙樹間又按聖迹記有四大塔祐云案至人處世利益弘大髮爪衣鉢咸爲法事故能寶塔覆起廣被天人造塔之源非唯散身而已

優填造釋迦梅檀像緣^{十五}

增一云帝釋請佛在天爲母說法佛念四衆懈怠不將侍者獨在天宮時優填王等咸思如來即勅巧工以梅檀作佛形高五尺

觀佛三昧云優填鑄金像佛從天^{廿二}下載像來

迎爲佛作禮佛言汝於來世大作佛事我諸弟子咸付囑汝空中化佛言若有造佛形像供養必得念佛清淨三昧

波斯匿王造金像記^{十六}

增一云王思佛久遂得病苦聞優填作佛便

召匠工以金作之煌若天金高五尺爾時閻
浮始有二像

育王弟出家造石像緣^{十七}

求離獄經云玉弟善容入山見梵志苦行求
仙以欲心動不能成辦又自念言沙門樂行
豈得無欲王聞弟語即增樂具七日當然以
念死故都無愛情自說無常深生信樂求欲
出家便成四果育王傳云以弟不樂世間即
使鬼神於城內爲造山水高十丈斷絕人物
自捨衣資造石像高一丈六在窟供養

祐云案畫像原始出自覺製於是金石香紵
鑄刻遂滋皆所以摹影相好髣髴尊儀及優
填所造殆其神力所化乎

釋迦留影在石室記^{十八}

觀佛三昧云龍王請佛常住池側恐發惡心
無由成道神天又請願爲一切佛便索羅刹
石窟於中止住分身諸國普爲說法佛受龍
請千五百歲石內現外諸人天衆供養佛影
影亦說法窟高一丈八尺深二十四步石青
白色在那乾訶那國古仙瞻蔔華林毒龍池

側青蓮泉北羅刹窟中阿那斯山巖南祐尋
法身無形隨應而現雖虛影霧曖即是如來
故捨身龍鬼宣法天衆是以經云是諸化佛
皆是真實斯之謂乎

阿育王造八萬四千塔記

廢典
相示

廿四十九

佛與四衆循邑而行有二童子沙中嬉戲見
佛相好大者以沙麴上佛鉢中小者隨喜因
發願得一天下一繖蓋王仍供諸佛佛令阿
難以沙安佛經行處因授記之後果生爲王
子名曰無憂身大羸蒞父不喜見仍有大志

專行征伐地出兵甲所向皆伏至于海際王
崩嗣位諸天灌頂神人欣慶
傳云初拜王日鐵輪飛降王閭浮提虛空地
下各四十里神鬼臣屬後示威嚴煞五百臣
燒煞諸女人號惡育王也立菟陀爲大臣即
隨喜王者白王立獄城煞人入無免者商主
比丘爲王說法王生信敬懺前獄業受佛遙
記譬喻經云宮中四事常供二萬沙門有沙
彌名端正年十三現通噉梵志二萬人令受
佛化傳云王問道人煞害非理如何得滅答

曰唯有起塔供僧救獄濟乏又以神力手掩日光作八萬四千道所照處起塔即壞七大塔取舍利從龍取寶篋莊嚴具勅鬼神於此洲滿一億家可立一塔即以月十五日月蝕時同時立八萬四千塔人衆咸慶阿育王既立塔已往雞雀寺優波崛多將眷屬從摩偷羅國飛來王所次遍示佛遊行處皆立表塔大弟子塔亦同供養返上正殿燒香大請即有三十萬比丘來集又感賓頭盧手舉眉毛爲王說法我住捷陀摩羅山同行萬羅漢王

普供養滿億百千金乃至衰老太子制約送半菴羅果研破羹內僧中行之便訖後世至第四世王佞臣告王欲令名德久存於世者當壞諸塔先往雞雀寺石師子吼王怖入城遂壞僧坊殺害比丘得沙門頭者賞之百金時得道人化爲多頭募賞藏空牙齒塔神恨之乃有女天神排山竿王及以兵衆無不死者孔雀之裔於此云殂祐尋八萬塔緣乃懸記後事廣長所說其驗已徵撰譜之始本論釋種但塔與阿育備記佛氏雖於文爲繁而

塔事備矣

釋迦遺法終限相二十一

雜阿含云我滅度後百年有優波崛多大作
佛事我以正法付囑人天教法在世千歲不
動又告天帝四王護持正法過千歲後非法
出現惡風暴雨多諸災患四方諸王殺害比
丘破壞塔寺餘十二年諸比丘衆來集中國
拘睺彌王生子難當手以血塗身如甲冑有
天勇力五百臣子形相並同一日雨血得紹
王位伐四惡王並戰殺盡王閭浮提三藏比

丘爲王說法生大信敬施僧無畏種種供養
滿十二年以得利養不修三業自嚴飾身離
出家法天龍惡念不復護衛高唱是言却後
七日佛法當滅至說戒日僧中鬪諍雖百千
人唯一羅漢三藏比丘不忍聞戒羅漢欲聞
弟子交諍遂相殺害於是畧盡諸天世人悲
哀號哭大地六動各各離散拘睺彌王聞生
懊惱諸邪見人競破塔廟及害比丘佛法索
然一時頓滅法既滅盡經具說滅相謂樂俗
衣及好服飾飲酒炙肉畜八不淨等

僧祐定以方等深密因知三寶常住常住之法理無興滅興滅之來乃隨世緣業耳晨離西隱不害千光之恒明也余以感通之道殆非人謀神交理會妙有恒准前約終相斯乃一期至於大歸不無出沒如摩耶等經千五百歲不淨觀法無聞於時今雖後世學者未顯或以爲滅自有行用何妨常存又云佛度女人正法滅半修行八散還復千年此亦據行有顯晦耳如來存世尚有不見聞者何況滅後根鈍障厚誠爲滅相故經云我淨土不

毀而衆見燒盡斯豈不據信解明昧故有興亡異途耶又依善見論佛法住世一萬年五千年修道得三達智後五千年修道不獲然有剃髮袈裟相續以斯通望經論互說增減不同豈不隨人情所見也又依入大乘論佛以正法付賓頭盧羅睺羅等十六大阿羅漢卷二令住持佛法又有九十九億諸阿羅漢親於佛前受籌住壽護法不絕諸大羅漢各有眷屬在閻浮提及餘三方天上爲作福田護法住故不明時候也又依別傳佛滅度後八百年中

師子國有大阿羅漢名爲慶友將欲滅度廣
召四衆佛以正法付囑迦葉乃至十六大阿
維漢在於四洲天上住壽護法乃至人壽滅
十歲時刀兵劫起諸聖人等于時暫隱乃至
人壽增一百歲時聖人總出如前化導還復
興顯至人壽增六萬歲已諸聖並集於閻浮
提收聚如來所有舍利起一大塔七寶莊嚴
踊在空中諸阿羅漢各禮佛塔作如是言敬
禮釋迦牟尼佛所有舍利我等受佛遺囑護
持正法今時緣已盡所作已辦我等今日奉

辭涅槃於是以願力故空中化火滅無遺骸
如來舍利沒金剛際爾時世界三寶名滅至
人壽七萬歲時有七萬億數辟支佛出現但
現通化爲世福田如是乃至八萬歲時彌勒
下生據此佛化時時相接也余以佛譜所修
則異於恒准俗中譜列始姓起於三五中流
從派不一佛則始於無始表開元求道之晨
末則終於無終明化道之緣莫竭由斯言故
釋尊流化訖於六萬之修齡獨覺接統極千
尺之嘉運也然經律明相千年萬年舉別情

